

皓社(1966)藍寶石禧後記 (鬼馬篇)

楊文燦

十二月十一日

加燦去到維景酒店係上晝十點，拿拿聲擲低响行李，同埋一班昨日已經嚟咗嘅老書友，搭專車去THE ONE東海海鮮酒家午宴，順便聽吓台灣旅程簡介。午宴大約八圍枱，成百人出席，除咗三幾張生面孔外，冚嘢同學及家眷、都係一有懷舊聚會就仆到惹响，唔使寫名掛咁咁鬼煩。香港班搞手仲請咗兩個專業影相佬嚟大影特影，個人影，分枱影，信望愛光善及社友又分班影，熱鬧嘅，擺款作狀都作到傻。一開席，乳豬、鮮蝦、柱甫、生翅、鵝掌、老虎班和走地雞陸續推出，仲有壽飽賀吓今日生日嘅壽星公婆，味味正斗，食到連今晚個餐都慳番。飯後西壬宜浩搵咗康泰旅行社代表講解台灣行程，汝興搵咗教聯講解丹霞山行程。聽完拍下擺枱鬆得，是關呢餐杰野有皓社香港基金照起，皓社藍寶石禧嘅熱身運動於是圓滿結束。



四五年藍寶石禧 熱身盛宴飽充饑
低頭細認老友記 影相專家滿場飛
乳豬生翅多美味 蝦球石班價不菲
蔬果壽飽齊賀喜 壽星公婆名守秘
錢幣衣衫同天氣 導遊講解好少理
唯一記住要早起 七時十分趕搭機
埋單個個唔使俾 皓社基金頂晒飛

十二月十二日

伍重同太座臨時報名加入台灣遊覽團，一早搭咗第一班機去台北。我哋六十人坐兩架旅遊巴士去到機場，先至發覺航班延誤兩小時，航空公司每人派四十皮算數。入關前，華德拉咗十個八個同學嚟關外飲早茶。大部份食咗早餐嘅同學，打算入關後買杯嘢飲同小食去消磨時間。加燦同埋飛龍(宜浩)、麗莎(飛龍嫂)、莎朗一班人行近關口，莎朗至醒起佢自己個張登機証仲係華德嘅。初初諗住嗰華德嘅二樓餐廳擲個証落嚟，但又驚住佢會擲落招牌頂個度，於是麗莎捱義氣陪同莎朗去擲登機証。點知華德睇查查，俾咗自己個証，好彩莎朗又試發覺得早，再麻煩麗莎飛步換証攞掂。

入關先查登機証 撞咗梅菲邪效應
好彩莎朗麗莎醒 唔係阿保變阿勝
補償四十太濕星 唔湯唔水欠公正
嘆杯飲品慢慢傾 伍重海倫好耐性

第一個景點嚟野柳女皇頭，一塊經歷風雨流水侵蝕後嘅

鈣質岩石。去到個陣，天公作對，橫風橫雨，唯一兩舊水台幣即刻買把遮，但係一樣頂唔順。唯有縮下縮下咁走埋去影幅相了事。去過嘅識途老馬話舊時女皇嘅大頸泡，企上頭壳頂影相全無問題，依家條頸得番棍仔咁幼，分分鐘唔使吊頸都會玩完。

野柳海邊女皇頭 髻高頭大頸幼幼
深宮有福唔享受 任從拍照佢唔騷
可憐老嫗與老叟 遮細雨大人濕透
唯有夾硬繞一週 食埋晚飯至抖抖

跟住去九份，一個因為拍戲而成名嘅悲情城市。戲入面講台灣一個土人部族為咗抗日，女人同小孩全部犧牲，保留糧食俾男丁去打日本仔，人家武器精良，最後滅族收場。九份從此人氣急昇，最吸引人嘅有三樣筍嘢：第一樣係薑母茶，茶入便有糖薑，甜甜哋又驅風防寒，係今日毛毛雨嘅天氣，啱晒合尺。第二樣叫豬肉紙，係豬肉乾牛肉乾嗰一類零食嘅總稱，有櫻花蝦(係台灣同日本之間嘅海產)，豬牛雞等款式。味道美，薄到飛起又點帶番屋企。唯有買番多少嘅巴士上面便食晒佢。第三樣係一間陶瓷店製造嘅精品小樂器，樂器外型多多：有龍、馬、龜、青蛙、鴨仔、狗仔、船、琴、飛機等等。樂器上便有七個窿仔代表七個音符，另加一個吹口發音。個老細兼打雜，示範用手指根據說明書，揸住或者鬆開窿仔，吹出「生日歌」及「有隻雀仔跌落水」等簡單歌仔。說明書內嘅歌曲，赫然有鄧麗君嘅「月亮代表我的心」等名曲，吹唔吹得到就唔知喇。大小樂器賣百五至三百台幣一件。用離做擺設都得，我哋成班人一擁入去，佢就連廁所小解都未得閒。

九份出名因拍戲 奈何天公不造美
落雨担遮老友記 飲薑母茶驅寒氣
豬肉紙款多靚味 製作過程商業秘
精巧陶瓷小樂器 簡短樂曲淋死你
食啲執啲番屋企 價廉物美合情理

晚飯地方叫五角船板，又叫爛皮鐵筒，成座嘢由頭到腳都係鐵嘅製成品，店內茶杯碗碟全部石頭所造，跌落脚趾度都幾係野。人人掛住影相多過食，菜式普普通通，一兜飯上面放咗十粒八粒蕃薯，搞到話飯就有得添，而蕃薯就無，真係頂佢唔順。好在又有壽星公婆今日生日，飯店送出嚟嘅生日蛋糕就正到加零一。埋棧嚟台北晶華酒店，名副其實五星級，唔係得支五星旗個種，舒服晒！

五角船板爛鐵筒 裝飾特別人擠擁
先來影相影餐檯 再試平凡地道艇
石頭碗碟鬼咁重 跌落脚趾有排痛
歌仔連理蛋糕送 賀生日婆婆公公
五星酒店鬧市中 歡迎香江六十眾

十二月十三日

今次行程入住嘅酒店，間間都係五星級，免費自助早餐係每一日最正斗嘅伙食，午餐同晚餐平平無奇。台灣嘅飲食文化同大陸比較差一皮，同香港比更加無得揮。我地班老嘢唔食得幾多，最緊要係去旅行同去廁所。加燦第一次盲騾騾搵廁所，就幾乎急到就地痲，成個台灣連半個廁所都無，佢

地叫做化妝間。另外台灣同胞叫芝士做起士、煙肉叫培根、沙律叫沙拉、橙叫柳丁、菠蘿叫鳳梨、咖啡叫得仲離譜，居然叫拿鐵。好彩跟埋大隊一齊嚟，唔係以加燻啲廣東口音嘅國語，加埋老早就俾番晒先生嘅中文知識，實行揸兜都搵唔到食。

五星酒店靚早餐 款式一列怪名單
柳丁原來係香橙 拿鐵咖啡點相關
中西合璧慢慢嘆 午晚菜式低幾班
廁所全無應習慣 起程先去化妝間

中正紀念堂固然就係紀念蔣介石總統嘅地方。嚟導遊大爆特爆蔣氏父子、宋美齡、張學良、李登輝、陳水扁嘅坊間秘聞嗰陣，佢個手機大響，來電顯示嘅鈴聲竟然係義勇軍進行曲，呢單嘢啱大陸絕對違法。表示今日嘅台灣，已經係民主晒。蔣公時代成條街都掛滿嘅反共標語亦都無埋，可惜大陸仲係一黨專政，貪污嚴重，加上英美法日俄，個個都係狼子野心，中國統一，大概唔會係我哋嘅年代見到咯。

介石撤退去台灣 親共打靶或收監
經國建設人人讚 經濟高飛渡難關
登輝台獨扯頭纜 水扁繼任樂承擔
政制分差隔重山 文字不通邊個啱
互相容讓未習慣 美法英俄個個奸
日人虎視早午晚 南北一統尚艱難

台灣行程最主要嘅景點一定係故宮博物館，館內三寶係玉辟邪，題詩攬核船同象牙塔。導遊首先簡介一輪，然後就自由參觀。日日有七八千大陸遊客來台，成間館塞到爆。呢班友嘅公民教育水準低到貼地，不論男女，打尖、當眾除鞋除襪搓腳趾、隨街吐痰、嘍非吸煙區食煙，同理公然推開人俾自己靠近參觀嘅情形，隨時隨地都會發生，仲好似奉旨咁，真係俾佢地激親。

象牙塔內無神仙 題詩攬核一隻船
東漢古玉眼前現 辟邪二千三百年
古物繽紛逐件展 大陸同胞亂爭先
醜行諸多當表演 唔興排隊靠打尖
巨掌推人身後現 回頭已被置旁邊

晚間嚟台北最高大廈一零一內以小籠飽出名嘅鼎泰豐食晚飯，除咗小籠包之外，無乜特別，繼續嚟地下商場入便大嘆甜品，然後車返晶華大酒店休息。

十二月十四日

坐捷運落台中，再坐番昨晚已經落咗去等我哋嘅大巴士去孔雀園。個導遊吹水，話依家唔啱交配季節，孔雀唔會開屏，有啲同學扒逆水話開梗。園內除咗普通孔雀之外，仲有白孔雀、黃金雞、獅頭雞、長尾雉等等珍禽，加燻都未曾見過，梗係擲個傻瓜機出嚟影番吓啦。影吓影吓，英雞（汝興）話着住佢風褸太焗，要除褸啲番一陣咁講。一除之下，有三隻孔雀，唔知係咪興搞基，竟然陸續開屏。於是你影相時我又影，嗰啲話孔雀一定開屏嘅同學，仲贏埋牙較添。

孔雀園內多珍禽 紅藍遊客六十人
雉雀飛雞籠中韞 雌雄孔雀一羣羣
三雀開屏情難禁 莫非英雞夠吸引
影飽相後發牙痕 贏埋牙較過足癮

蒞到日月潭邊根餐館，所食嘅午餐，一樣係麻麻喇。飛龍請食嘅茶葉蛋就零舍不同，多謝！舊地重遊嘅同學話，日月潭經歷台灣地震同人事變動，再商業化之後，基本上已經面目全非。老蔣同宋美齡每年喺度逗留三四個月嘅別墅，老

早就賣咗俾人起埋酒店，剩低個涼亭，慈恩塔（老蔣母親紀念塔），圓山飯店等景點，俾我哋分開兩隻船繞潭遠眺。



茶葉浸蛋款式鮮 食飽搭船兜個圈
慈恩塔高聳雲端 涼亭建在水旁邊
日月潭別墅不見 圓山飯店漸寒酸
蔣公宋婆早化煙 空留舊照後人瞻
人生功過唔想算 願人長久共嬋娟

十二月十五日

又係捷運同旅遊巴組合，帶我哋去台南睇三個景點，赤崁樓，億載金城同埋安平堡。赤崁樓係台灣人郭懷起義抵抗荷蘭人，失敗後由荷蘭人喺一六五零年建造嘅，又叫紅毛樓，後人叫外籍人士紅毛鬼，大概係咁樣開始。鄭成功趕走荷蘭佬之後，呢度就係佢嘅行政中心。我哋分開四組人，就嚟行政大樓前面嘅廣場排成PC66影集體相，由鄺碧玲夫婦佛烈主持，嚟大樓個騎樓居高影落嚟，威水威水一吓。億載金城係十幾座炮台嘅防禦工事古蹟，舊時大炮嘅質素，同今日嘅炮灰就差唔多。鄭氏三代就住嚟安平古堡，亦係荷蘭人投降簽和約嘅地方。



郭懷革命恨未休 荷蘭人建赤崁樓
億載金城古炮舊 遊人作狀入鏡頭
成功彷彿如喪家狗 清兵趕佢無氣咁
劃走紅毛個班友 霸住台灣做寶口
安平古堡三代守 後人照舊兜一兜

安平貴記午飯回到大牌檔時代坐檯仔，有一樣地道菜叫棺材板，係將炸脆嘅長方麵包挖空再加入肉醬而成，名稱古怪而味道甚佳。晚飯又係黃腫腳不消提，反而飯後嘅六合夜市多姿多彩，十足香港大笪地。餐餐粗茶淡飯制咗咁耐，依家宵夜唔食番狗本點對得自己住。買完一大輪櫻花蝦乾、烏魚子乾同各式紀念品，之後就好似餓鬼投胎咁各就各位。成

個夜市最誇張嘅檔口，就係導遊特別介紹嗰間街尾嘅飲料檔，檔口側根仲有馬英九簽名嘅六呎高肖像，係唔係親筆簽就唔知。呢間檔口有九條友開工，食客排晒大隊。我哋喺度大嘆木瓜奶茶同蜂蜜苦瓜汁，返車嗰陣，猛拍導遊個膊頭話無介紹錯。



坐張機仔夠靈慧 弓背屈膝強作狀
 棺形脆麵包長方 挖空加料如落葬
 六合夜市街頭檔 好難心內唔想燴
 蝦乾魚子上足倉 蜂蜜苦瓜汁誰創
 九人開工做到喪 總統廣告難抵抗
 排隊飲野似渴荒 飲完廁所急急放
 買紀念品莫恐慌 東挑西揀十來往

十二月十六日

今日下午要去高雄機場搭機返港，十一點退房後即刻車去買鳳梨酥。呢間舖頭鋒頭甚勁，買得多仲同你入埋箱添。食完午飯班同學就去參觀兩間廟宇式嘅建築：春秋閣同埋龍虎塔。春秋閣紀念民間武聖關公，龍虎塔入便有廿四孝子，十二賢士，仲有玉皇大帝三十六宮將圖添。睇落呢三十六隻嘢係威係勢，又唔似係俾我哋個族類大鬧天宮嗰陣打到仆街嗰班友嘍。去西子灣諗住參觀英國舊大使館，點知裝修唔開放，求其影吓相就去夢商場土庫，打躉夾各自搵食，大多數同學食豬牛羊肉湯麵，鹹到跳舞，食完去機場拜拜。

武聖本來係老粗 民間少數察秋毫
 玉皇宮將憑空造 賢士孝子在插圖
 夢幻商場到一到 湯麵鹹到跳咩舞
 台北至高雄道路 散落唔少老脚毛

十二月十七日



今日我哋正式藍寶石禧，午宴有李美煥、劉彩恩、鍾偉光同朱慧齡四位老師到賀。除朱老師外，其他三師年逾九

旬。四師對我哋嘅關愛，真係萬二分難得。唐宮午宴之後，一人派一件外套，操兵去母校小學部大梯級影相。設計部同學諗出嚟嘅外套一面紅而一面藍，可以正反穿着，象徵紅藍兒女。影相嗰陣女仔穿紅而男仔穿藍，有型有款，直情型過異形。母校嘅新校舍大廈，仲未有消防署入伙紙，不准參觀。中六嘅課室暫時搬落樓下。我哋喺禮堂仔上台嗰陣，已經係下午六點，跟住又要去倫敦酒樓出席晚宴，成班老野趕到索晒氣，無計啦。

藍寶石禧齊齊到 老師同埋老元老
 紅藍底面親外套 型過異形計過數
 擺款作狀夠風騷 威風凜凜人所無
 校園內外似兵操 千祈咪呷我哋醋



十二月十八日

今朝繼續乘搭大巴士，喺香港同九龍兜大圈去緬懷一下我哋學生時期嘅舊家園，沿途入去海防博物館，睇吓由明清時代到回歸嗰陣嘅海防文物，梗係又大影特影和一番唏噓。睇見明清兵將嘅盔甲質地，等於依家嘅睡衣加幾排銅鐵鈕，唔怪得要簽咁多不平等條約咯。漢朝董仲舒先生泉下有知，肯定深悔當初罷黜百家獨尊儒學罷。

睡衣幾排銅鐵鈕 盔甲標準未入流
 子彈打來包穿透 孔明番生嘆無謀
 罷黜百家魔妖咒 喪權辱國嘅根由
 人面全非憶故舊 司機唔該再兜兜



衛蘭軒嘅午膳比台灣團餐好得多，可惜班老書友個個留肚，準備今晚博盡。下午六點着住套單吊西去到跑馬地馬會會所，杯酒交歡。由於大飛哥同新飛嫂大駕光臨，影相更加影到八彩。我社石刻專家兼書法大師陳樹衡君，特登為今晚盛會用草書寫咗一首對聯高掛大堂正中。佢另外用楷書隸書